

e-vladi i cyber kriminalu. I dalje je potrebno uskladiti propise sa Direktivom o elektronskom poslovanju i provedbenim propisima o uslugama uslovljenog pristupa. Državni zakon o elektronskom poslovanju još nije stupio na snagu. I dalje se ne provodi državni zakon o elektronskom potpisu iz 2006. godine. Administrativni kapaciteti Ministarstva komunikacija i prometa BiH i dalje su slabi.

Određeni napredak zabilježen je u oblasti **audiovizuelne politike i medija**. Novi skup pravila koja je usvojio RAK, u velikoj mjeri je uskladio propise sa Direktivom o audiovizuelnim medijskim uslugama (AVMSD). U Načrtu kodeksa o audiovizuelnim i radijskim programima i kodeksa o audiovizuelnim komercijalnim komunikacijama Direktiva o audiovizuelnim medijskim uslugama djelimično je preuzeta. I dalje je potrebno uvrstiti preostale odredbe dva člana ove Direktive. Entitetski zakoni o uslugama javnog emitovanja nisu u skladu sa državnim zakonom. RAK je objavio Odluku o korištenju Multiplex A (MUX X) za digitalno zemaljsko emitovanje. RAK je također započeo sa izradom kriterija za ulaz postojećih TV stanica u komercijalni MUX i dokumente za licenciranje MUX operatera. Radna grupa koja je nadgledala ovaj postupak je prestala da postoji.

Nema daljeg napretka kada se radi o prelazu sa analognog na digitalno zemaljsko emitovanje. Prelazak na digitalno emitovanje, najprije planiran do kraja 2011. godine, odgođen je za kraj 2014. godine. Ovo izaziva moguću zabrinutost za pravovremeno provođenje procesa. Nije donesena nikakva odluka o načinu korištenja vrijednog spektra koji bi ovaj prelaz omogućio.

Imenovani su članovi stručnog Sekretarijata za Forum o digitalnoj televiziji, ali on nije operativan. Nepromijenjen je statut Javnog radio-televizijskog servisa BHRT (*vidi Poglavlje 2.2 - Ljudska prava i zaštita manjina*). Potrebno je usvojiti statut javnog RTV servisa (PBS). Dva nova člana nadzornog odbora BHRT-a još nisu imenovana. Reforma sektora javnog emitovanja je dodatno odložena.

Ostvaren je mali napredak u oblasti informacijskog društva i medija. Usklađivanje pravnog okvira za javno emitovanje je nepotpuno. Ozbiljan razlog za zabrinutost i dalje predstavljaju nedostatak koordinacije i odgovarajućih kadrovskih resursa, te posebno stalne prijetnje funkcionalnoj i finansijskoj nezavisnosti Regulatorne agencije za komunikacije BiH. Zakonodavno usklađivanje u oblasti elektronskih komunikacija, informacijskog društva i medija nije napredovalo. Sveukupno gledano, pripreme su na početnom nivou.

4.2.7 Finansijska kontrola

Ostvaren je određeni napredak u oblasti **javne interne finansijske kontrole (PIFC)**. Provode se dokumenti i akcioni planovi na državnom i entitetskim nivoima, iako uz odlaganja. Usvojene su izmjene i dopune Zakona o internoj reviziji i Zakona o finansiranju. Koordinacioni odbor za sve centralne harmonizacijske jedinice, koji je osiguravao jedinstvenu platformu za koordinaciju propisa i metodologije, prestao je obavljati tu ulogu. Iz tog razloga, propisi su se razvijali u različitim pravcima. Federacija BiH općenito zaostaje za državom i Republikom Srpskom. Jedinice za internu kontrolu nisu u potpunosti operativne, iako je nešto povećan broj stručnih internih revizora u zemlji.

Ostvaren je mali napredak u oblasti **vanjske revizije**. Funkcionalni kapacitet četiri najviše revizorske institucije poboljšan je s revizijom uspješnosti poslovanja provedenom na svim nivoima. Ipak, njihova finansijska nezavisnost i dalje je ugrožena. Nisu uloženi napor da se osigura nezavisnost od izvršne vlasti državnog Ureda za reviziju institucija niti da se te odredbe ugrade u Ustav.

U pogledu **zaštite finansijskih interesa EU i zaštite eura od krivotvorenja**, Bosna i Hercegovina je u ranoj fazi priprema.

Ostvaren je mali napredak u oblasti finansijske kontrole. Potrebni su značajni naponi za usvajanje i provođenja zakonodavstva PIFC-a, nastavak koordinacije između centralnih harmonizacijskih jedinica i izgradnju kapaciteta za finansijsko upravljanje i kontrolu i internu reviziju. Potrebno je riješiti pitanje nezavisnosti državnog Ureda za reviziju institucija. Sveukupno gledano, pripreme su u ranoj fazi.

4.2.8. Statistika

Bilježi se određeni napredak u oblasti statistike. Nisu usvojene izmjene i dopune Zakona o statistici koje se odnose na preporuke prilagođene globalne procjene iz 2011. godine.

Postignut je mali napredak u oblasti **statističke infrastrukture**. Saradnja između državne Agencije za statistiku i entitetskih instituta za statistiku je nešto poboljšana. Potrebno je i dalje raditi na znatnom jačanju njihove saradnje i koordinacije aktivnosti. Prisutno je i kontinuirano nepravilno provođenje državnog Zakona o statistici i Sporazuma o saradnji i koordinaciji. Uprava za indirektno oporezivanje ne pruža Agenciji za statistiku potrebne podatke iz administrativnih izvora, što dovodi do lošeg kvaliteta statistike poslovanja, makroekonomske statistike i statistike vanjske trgovine. Potrebno je izmijeniti i dopuniti Zakon o indirektnom oporezivanju kako bi se Agenciji za statistiku omogućilo da koristi sve raspoložive administrativne podatke za statističke svrhe.

Mali napredak je postignut na području **klasifikacije i registara**. Statistički poslovni registar je u funkciji, ali je nepotpun zbog nedostatka administrativnih podataka potrebnih za njegovo puno funkcionisanje. Osnovana je međuagencijska radna grupa za izradu nacrtu klasifikacije teritorijalnih jedinica za statistiku u zemlji. Nastavlja se rasprava, u smislu obaveze zemlje na osnovu Privremenog sporazuma, o dostavljanju podataka Evropskoj uniji o BDP-u po glavi stanovnika na nivou NUTS 2 do 1. jula 2013.

Postignut je napredak u **sektorskoj statistici**. Usvojen je Zakon o popisu stanovništva i domaćinstava u Bosni i Hercegovini za 2013. Radovi na popisu su planirani za period od 1. do 15. aprila 2013. Centralni ured za popis stanovništva je postao operativan. Potrebno je obaviti brojne aktivnosti planiranja, komunikacije i koordinacije. Usvojen je budžet za popis stanovništva u 2013. Nakon popisa stanovništva planiran je poljoprivredni popis. Općenito, poljoprivredna statistika zahtjeva značajno poboljšanje.

Bilježi se mali napredak u oblasti makroekonomske statistike. Objavljena je godišnja procjena BDP-a za 2011. Kvartalni nacionalni računi se ne mogu izraditi dok se ne proizvedu odgovarajući kratkoročni indikatori i dok ne dođe do neophodne saradnje između svih uključenih strana. Završena je terenska anketa o potrošnji domaćinstava, a očekuje se da će rezultati biti dostupni krajem oktobra 2012. Anketa o radnoj snazi je provedena 2012. i objavljeni su preliminarni podaci.

Ostvaren je određeni napredak u području statistike. I dalje je potrebno poboljšati sektorsku statistiku poput nacionalnih računa, te poslovne i poljoprivredne statistike. Očekuje se da će popis stanovništva i domaćinstava biti proveden tokom 2013. Saradnja između Agencije za statistiku i entitetskih instituta za statistiku, kao i između Agencije za statistiku i relevantnih agencija na državnom nivou je blago poboljšana. Potrebno je raditi na značajnom poboljšanju komunikacije između entiteta, koordinacije i procesa donošenja odluka u statističkom sistemu zemlje. Mnogo toga je potrebno učiniti kako bi se dobila potpuno pouzdana statistika na različitim nivoima vlasti. Sveukupno gledano, pripreme su umjereno napredovale.